



2023-imut aningaasanut inatsisissatut siunnersuut.

Aningaasaqarnermut Naligiissitaanermullu Naalakkersuisoq
(Pingajussaaneerqarnera)

Aallaqqaasiutitut Naalakkersuisut partiillu tamaasa qutsavigilakka aappaagumut aningaasanut inatsisissap pitsaasumik kinguneqarluartussamillu isumaqatiginninniarnermut. Takullugu nuannerpoq, annertuunut suleqatigiissuteqarsinnaasugut. Pingaartumik tulluusimaarutigaaara, illuatungiliuttuni partiit kinguneqarluartussamik eqqarsassallutik aalajangersimammata, isumaqataanginniaannaratik soorlu ajoraluartumik qinigaaffimmi kingullermi amerlavallaanik takusareeripput.

Isertugaataangilaq, uagut Demokraatiniit Aningaasanut inatsisissatut siunnersuummut annertooujussuarmik isornartorsiuisimagatta, saqqummiunneqaqqaarmat. Itigartitsiinnaratali, Naalakkersuisunut kinguneqarluartussamik isumaqatiginninniarnissaq toqqarsimavarput innuttaasunut siunnersuutip kinguneqarluarnerunissaa siunertaralugu.

Isumaqatiginninniarnermi angusagut iluarisimaarutigisagut pingasut erseqqissarlugit aallaqqaasiutigilaarlakka.

1. Isornartittorujussimavarput, 2023-imut aningaasanut inatsisissatut siunnersuutip amigartoorutaasussaana. Uagutsinnut pingaartuuvoq aningaasanut inatsisip sinneqartoorutaanissaa, taamaangikkuni atuivallaarnerput kinguaarit tullitta akiliinissaannik kinguneqartussaammat. Tamanna tunngavigalugu pingaaruteqarsimavoq qularnaassallugu, Aningaasanut inatsisip sinneqartooruteqarnissaa. Tamannalu piviusunngorpoq, tassami 2023-imut Aningaasanut inatsisissatut siunnersuut sinneqartooruteqalaartussangormat.
2. Suliniutigiuarparput nunaqqatigut aningaasateqarnerunissaat imminnut atugassaminnik. Taamaattumik nuannaarutigisorujussuuarput, neqinut akitsuutip peerneqarnissaanik siunnersuuterput uani aningaasanut inatsimmi piviusunngortussangormat. Taassuma kingunerissavaa, ilaqtariit unnukkorsiutissaminnut taquassaminnullu sipaarsinnaalissammata. Taamaaliornermikkullu aningaasat sipaakkatik ilaqtariinni allanut atorsinnaangorlugit. Naatsumik oqaatigalugu, inuuniarneq nunatsinni akikinnerulersipparput.
3. Pisortat allaffissornerat aningaasartuutikinnerulissaaq. Tamanna sivirusumik sulissutigisimavarput. Tamannalumi partiit tamarmik isumagerpasippaat. Taamaakkaluartorli tassunga aningaasartuutit ukiuni kingullerni amerlasuuni annertusigaluttuinnartoq takusimavarput. Uuminnga Aningaasanut inatsimmi pisortat allaffissornerannut aningaasartuutit appartinneqarnissaat tigussaasumik isumaqatigiissutigaarput. Tamanna pitsaavoq, aallaqqaasiutaannaavorli. Anguniagaraarput pisortat allaffissornerannut aningaasartuutit siullermik 2015-imitut annertussuseqalerlutik appartinneqarnissaat. Tamanna ukiuni tulliuttuni sulissutigeqqissavarput.



Immikkoortut taakku pingasut saniatigut piumasaraarput, seqqunik- siffissanillu pilatsinnissamut utaqqisut appartinneqarnissaat. Nuannaarutigisorujussuarput, tassunga siunertamut immikkut aningaasaliisoqarmat.

2023-imut Aningaasanut inatsit naaperiaaffiuvoq, taamaattumilluuna partiit arlaannaataluunniit, kissaatigisatik tamaasa piviusunngortinngikkaat. Demokraatit kissaatigisimagaluarpaat, kissaatiginngisaminnik meerartaarsinnaanngitsut Danmarkimi IVF- aamma ICSI ikiorserneqarnissaannut aningaasanik immikkoortitsisoqassasoq, taamaasillutik angalanernut, ineqarnernut, misissortinnernut nakorsartinnermullu aningaasartuutit tamarmik Peqqinnissaqarfimmik akilerneqarlutik. Aammattaaq kissaatigisimagaluarparput annertunerusumik sulissutigineqassasoq, nunatsinni meeqqat tamarmik timersornissaminnut imaluunniit sunngiffiminni sammisassaqaqarnissaminnut pitsaanerusumik periarfissaqaqarnissaat. Kissaatigisimagaluarparput, nutaanut suliffeqarfinnut aallarniutitut tapiissuteqartarnissamut aningaasanik immikkoortitsisoqassasoq. Taamatutaaq kissaatigisimagaluarparput aallartisaanermut pikkorissartitsinissanut, nuna tamakkerlugu ingerlanneqartussanut aningaasaliinissaq.

Kingullertullu, uagut isumassarsiarinngilluinnarparput, ICC aningaasanik amerlanernik pissasoq. ICC NGO-juvoq taamaattumillu Namminersorlutik Oqartussanit aningaasanik pisariaqanngikkaluarluni. Akerlianilli ICC-p akissarsiat qaffasissut appartittariaqaraluarpai suliaminullu nunat assigiinngitsut akornanni aningaasaaateqarfinnut qinnuteqaateqarluni.

Oqaatigineqareertutulli, kissaatigisat tamarmik piviusunngortinnissaat piviusunngortinneqarsinnaanngilaq. Sorsuttuassaagullu, kissaatigisatta isumassarsiaatalu ukiuni tulliuttuni piviusunngortinnissaannut.

Taamatut naattunnguamik oqaaseqaateqarluta 2023-imut Aningaasanut Inatsisissatut siunnersuutip akuersissutigineqarnissaa innersuussutigaarput.